

Ramazanska poruka-čestitka glavnog imama sisačkog

## RAMAZAN-MJESEC DUHOVNOG PREPORODA

U ponedjeljak 01. Kolovoza bio je prvi dan blagoslovljenog mjeseca Ramazana, najodabranijeg mjeseca u godini za vjernike islamske vjere. Ramazan je mjesec intenzivnije pobožnosti, mjesec duhovne obnove i afirmacije pozitivnih vrijednosti među ljudima.

Ramazan je mjesec koji povezuje dva veoma značajna momenta u životu muslimana: obavezu posta i sjećanje na objavljivanje Kur'ana.

Trenutak dodira Neba i čovjeka, trenutak spuštanja Objave kao najvažniji trenutak u cjelokupnoj povijesti svijeta dogodio se u blagoslovljenom mjesecu ramazanu, u noći Kadr, noći prve Objave i prvog kontakta između Boga i Njegovog poslanika Muhammeda alejhisselama. Otuda vjernici u mjesecu ramazanu kao mjesecu Kur'ana pojačano uče, čitaju proučavaju i razmišljaju o kur'anskim porukama, poukama i napajaju se njegovim sadržajima koji imaju trajnu vrijednost. "Uči, čitaj i proučavaj u ime Boga koji je sve stvorio"-prve su riječi Kur'ana koji predstavlja središnju istinu islamskog života u kojem musliman živi od rođenja pa sve do svoje smrti.

Post je najspecifičnije obilježje ramazanskog života i najvažniji vjerski obred koji se može uraditi u ovom mjesecu.

Post je čin ljubavi stvorenog prema Stvoritelju i izraz snažne volje da se upravlja sobom i svojim prohtjevima. Zato Uzvišeni Bog za post kaže: "Post je Moj i Ja za njega posebno nagradujem". Čovjek je u sredini između razuma duše i požude tijela. U tom stalnom nadmetanju između čovjekovog duha i čovjekovog tijela najbolji sudija je pobožnost kojeg propisuje vjera kroz post. Jer u postu duša i tijelo postaju jedno biće u pokornosti Uzvišenom Bogu.

Kroz post kao drevni vjerski obred i dio univerzalne duhovne institucije prisjećamo se plejade Božijih poslanika, drevnih naroda i civilizacija koji su kroz post željeli pridobiti Božiju naklonost, uputu i Milost.

Dok postimo prisjećamo se i suosjećamo se sa milijunima siromašnih i gladnih u svijetu kojima je post svakodnevnica. Dok postimo, u čaši vode i u jednom zalogaju hrane vidimo Božiju milost i najvjerodostojnije se osvjedočujemo u našu nemoć i egzistencijalnu ovisnost o našem Stvoritelju. Kroz drevni post ispunjavamo različite dimenzije ljudskog poimanja bitisanja i realnosti.

Ramazan obiluje značajnim događajima u povijesti islama iz kojih čitamo poruke milosrđa, dobročinstva, suosjećanja koje posebno oživljavamo u ovom mjesecu, mjesecu kada se svako dobro djelo višestruko nagrađuje.

Nadam se da ćemo svi uspješno položiti ramazansku školu u kojoj je najvažniji predmet strpljivost, te izgraditi moralne kvalitete koje su nam danas itekako potrebne.

Toplina obiteljskog doma i prijateljske komunikacije nesumnjivo trebaju biti osnaženi u ovom mjesecu ramazanu, što svakako nosi sa sobom ljubav prema roditeljima, supružnicima, djeci, starijima, iznemoglim i bolesnim.

U tom kretanju i naglašenoj relaciji vidim snagu mjeseca ramazana i blagodati njegovih dana i noći. U želji da sve blagodati ovog časnog mjeseca doživite

**RAMAZAN ŠERIF MUBAREK OLSUN!**

Glavni imam sisački  
Alem ef. Crnkčić